



Razmišljanje o životu na ovom svijetu (Medina)

Hatib: dr. Ali ibn Abdurrahman el-Huzejfi

20. zul-hidže 1442. po Hidžri / 30. juli 2021.

Hvala Allahu, Silnome, Oprostitelju, Onome Koji čini da dan i noć naizmjenice nastupaju, i kod Njega je sve do roka određenog. Hvalim svoga Gospodara i zahvaljujem Mu na blagodatima i dobroti.

Svjedočim da nema boga osim Allaha, Jedinog, Koji druga nema, Jednog, Onoga kome je sve potčinjeno, i svjedočim da je naš vjerovjesnik i prvak Muhammed, sallallahu alejhi ve sellem, Njegov rob i poslanik, odabranik i miljenik. Allahu moj, smiluj se, spasi i blagoslovi Svoga roba i poslanika Muhammeda, sallallahu alejhi ve sellem, i njegovu porodicu i ashabe.

Bojte se Allaha, i budite Mu pokorni, jer je pokornost Njemu najispravniji i najbolji put, i pripremite opskrbu za ahiret, a najbolja opskrba je bogobožnost.

O vjernici, razmišljajte o kratkoći trajanja dunjaluka, njegovim slabovrijednim ukrasima, često promjeni njegovih stanja, i shvatit ćete njegovu pravu vrijednost, i naučit ćete njegovu tajnu. Ko svoje nade bude polagao u dunjaluk, sebe je obmanuo, a ko mu se prikloni, propast je odabrao.

Kratkoća dunjaluka mjeri se kratkoćom životnog vijeka, a životni vijek počinje sa satima, nastavlja se sa danima, pa mjesecima i godinama, i dolazi do svog vrhunca i završetka, i niko ne zna kakve ga velike i teške situacije čekaju nakon smrti. Da li je, čovječe, život, nakon tvoje smrti tvoj život? Život jednog stvorenja u odnosu na živote generacija samo je jedan kratki trenutak, a dunjaluk je svakako samo prolazni i varljivi užitak.

Uzvišeni kaže: "O narode moj, život na ovome svijetu samo je prolazno uživanje, a onaj svijet je, zaista, kuća vječna." (Gafir, 39)





“Navedi im kao primjer da je život na ovome svijetu kao bilje, koje i poslije natapanja vodom, koju Mi s neba spuštamo, ipak postane suho, i vjetrovi ga raznesu. A Allah sve može!” (El-Kehf, 45)

Naš Gospodar obavijestio nas je o kratkoći boravka ljudi u kaburovima i da će cijeli taj period od smrti do proživljenja trajati koliko je jedan trenutak.

Uzvišeni kaže: “A na Dan kada ih On sakupi, učinit će im se da su boravili samo jedan čas u danu, i jedni druge će prepoznati.” (Junus, 45)

“A na Dan kad nastupi Čas oživljenja, zločinci će se zaklinjati da su u grobovima samo jedan čas ostali; a i prije su istinu izbjegavali.” (Er-Rum, 55)

“Ti izdrži kao što su izdržali odlučni poslanici i ne traži da im kazna što prije dođe! A onoga Dana kada dožive ono čime im se prijete, učinit će im se da su ostali samo jedan čas dana. I dosta! A zar će ko drugi biti uništen do narod raskalašeni!” (El-Ahkaf, 35)

Šta je tvoj život u odnosu na čas? I koliki je tvoj udio u ovom času? Blago onome ko bude činio dobra djela i klonio se zabranjenih stvari, i time stekao Allahovo zadovoljstvo u džennetima uživanja, a teško onome ko bude slijedio prohtjeve i zapostavio namaze i druge vjerske obaveze, i time stekao propast u džehennemskim provalijama.

O ti koga je obmanulo njegovo zdravlje, pa si Gospodaru nepokoran!

O ti koga je pokvarilo slobodno vrijeme, pa si se odao igri i zabavi!

O ti koga je zaveo imetak, pa si moralno posrnuo!

O ti koga je obmanula mladost, pa si zaboravio na prolazak i nestanak!

O ti koga je ohrabrila dužina života i ostvarenje nekih nada, šta će biti s tobom kada ti smrt nenajavljena dođe, a nema ti povratka na dunjaluk?

U hadisu se kaže: “Sjećajte se često one koja će prekinuti sve užitke (smrti), jer to sjećanje umanjuje (u ljudskim očima) ono što je veliko, i uvećava ono što je malo.”

U drugom hadisu navodi se: “Smrt je dovoljan vaiz.”





O ti koji si nemaran, koji si leđa Objavi okrenuo i koji ustrajavaš u grijesima, zar nije vrijeme da se pokaješ svome Gospodaru i predaš Njegovoj volji? Zar nije vrijeme da se probudiš iz teškog nemara i odazoveš? Zar ti nisu pouka nestale generacije i prazni domovi, kako su nakon stvarnosti samo trag ostali, i nakon slave samo vijest ostali. Zaista je u odlasku jedne i dolasku druge godine pouka. Dan ispratiš, a drugi dočekaš, sve dok ne prođe tvoj kratki život i nestanu sve nade i očekivanja.

Uzvišeni kaže: “... i da je čovjekovo samo ono što sam uradi, i da će se trud njegov, sigurno, iskazati, i da će prema njemu u potpunosti nagrađen ili kažnjen biti, i da će se Gospodaru tvome ponovo vratiti.” (En-Nedžm, 39–42)

Radi za Kuću vječnosti, čiji užici nikada neće proći, umanjiti se niti nestati. Uzvišeni kaže: “Uđite u nj, u miru, ovo je Dan vječni!” U njemu će imati što zažele – a od Nas i više.” (Kaf, 34–35)

Čuvajte se Vatre, čija se kazna neće ublažiti njenim stanovnicima, izvršavajući Njegove naredbe i izbjegavajući Njegovu žestoku srdžbu. Uzvišeni kaže: “Onima koji ne budu vjerovali bit će odijela od vatre skrojena, a ključala voda bit će na glave njihove lijevana; od nje će se istopiti ono što je u trbusima njihovim, i koža, a gvozdanim maljevima bit će mlačeni; kad god pokušaju zbog teškog jada iz nje izaći, bit će u nju vraćeni: “Iskusite patnju u užasnoj vatri!” (El-Hadždž, 19–22); “A pripremite što i za duše svoje i bojte se Allaha i znajte da ćete se s Njim susresti. A ti obraduj vjernike” (El-Bekara, 223).

O vjernici, Allah vam je otvorio vrata Svoje milosti, propisao vam je činjenje dobrih djela i ostavljanje loših djela, i neka niko od vas ne zatvara samom sebi ta vrata suprotstavljajući se Allahu činjenjem grijeha, a On je rekao: “... a milost Moja obuhvata sve; dat ću je onima koji se budu grijeha klonili i zekat davali, i onima koji u dokaze Naše budu vjerovali.” (El-A’raf, 156)

Iskoristi, o čovječe, vrijeme blagostanja, jer dan koji ode nikada se neće vratiti, isprati dane koji su ti dati sa dobrim djelima, i čuvaj stranice svoje knjige od loših djela.





“KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA.” (PREPOROD)

HUTBE 

Ibn Abbas, radijallahu anhuma, prenosi da je Allahov Poslanik, sallallahu alejhi ve sellem, rekao: “Većinu ljudi obmanu dvije blagodati: zdravlje i slobodno vrijeme.”

Ibn Omer, radijallahu anhuma, prenosi da je Allahov Poslanik, sallallahu alejhi ve sellem, rekao: “Budi na dunjaluku kao stranac ili putnik namjernik.” Ibn Omer, radijallahu anhuma, govorio je: “Kada osvaneš, ne očekuj noć, a kada omrkneš, ne očekuj jutro. Uzmi od svog zdravlja za svoju bolest i od svog života za svoju smrt.”

Uzvišeni kaže: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šalžite mu pozdrav!” (El-Ahzab, 56) Poslanik, sallallahu alejhi ve sellem, rekao je: “Ko na mene donese jedan salavat, Allah na njega donese deset salavata.”

Donosite salavate i selame na prvaka prvih i potonjih i predvodnika svih poslanika.

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

